



Mahein Nia Lian Nú. 47, 11 Abril 2013

## Fortifika Prevensaun Krime Ka Kombate Krime?

### Introdusaun

#### “Prevene duke kura”

Durante ne'e mosu problema oho malu ne'ebé mostra an ho forma oin-oin. Problema hirak ne'e ameasa tebes ba siguransa nasional. Konsekuensia husi problema ne'e fornese impaktu negativu ba sosiadade.

Relasiona ho aktu krime hirak ne'e, mosu perguntas oin-oin iha sosiadade, Tanba sa mosu oho malu? Se mak responsavel ba kazu ne'e? No, PNTL nia ejiztensia iha ne'ebé? Oinsa governu nia planu no asaun? Efetivu ka lae servisu PNTL? Duidas hirak ne'e nia prezensa sadik públiku nia hanoin, inklui Fundasaun Mahein – FM hodi formula ninia hanoin no ideas ba prosesu dezenvolvimentu siguransa rai laran nian.

Liu husi Fundasaun Mahein Lian ne'e sei foka no analiza bá kazu oho malu ka krime no nia implikasauan ba servisu siguransa PNTL. Nune'e mós Fundasaun Mahein koko haklot liu tan espasu atividade hodi tetu/dasi kona-bá kazu oho malu iha Dili laran.

Objetivu husi relatoriu ne'e rasik atu oferta hanoin no loke lidun diskusaun ida ba autor siguransa sira atu bele debate no kria mekanizmu prevensaun ida ne'ebé efetivu iha prosesu operacional atu nune'e bele minimiza aktu krime iha teritoria Timor-Leste.

Sub tema husi diskripsaun ne'ebé iha forma relatoriu ne'e mak hanesan: **I Introdusaun.** **II Polisia Nasional Timor-Leste – PNTL**, iha parte ne'e sei deskreve, define no elabora funsionamentu husi instituisaun PNTL. **III Konfliktu**, iha sesaun ne'e sei esplora no mostra definisaun no kronolojia konfliktu iha Timor-Leste, espesifikamente Dili. **IV Solusaun**, Iha lidun ne'e Fundasaun Mahein apresenta sujestaun iha termu dalan diak ba paz no dame liu husi obra PNTL. No ikus, **V Rekomendasaun**. Nu'udar sesaun ikus ne'ebé Fundasaun Mahein apresenta hanoin ruma hanesan rekomendasaun ba públiku atu bele kolabora iha servisu siguransa Nasional nian.

### **PNTL nia Misaun no Kompetensia**

Durante tinan sanulu resin (13) institusaun Polisia Nasional Timor Leste (PNTL) hala'o ona nia kna'ar hodi serve povu no estadu Timor-Leste. Servisu atu mantein paz no dame, PNTL la ses-an husi limitasaun no dezafius oi-oin. Maibe ho espritu nasionalizmu no komitmentu, PNTL nunca dez-anima atu serve no proteze povu husi aktu krime no konfliktu sira ne'ebé afeita ba vida diaria povu iha Timor-Leste. Mosu perguntas, Tanba sa PNTL iha kbi'it no forsa atu serve no proteze povu? Ninia resposta mak Fundasaun Mahein sei lekar sai no esplika sobre Natureza, Misaun no Kompetensia PNTL nian.

## 1. Natureza no Misaun PNTL

Instituisaun PNTL nu'udar orgaun estadu ne'ebé atu fo garantia ba paz no estabilidade iha rai laran. PNTL nia servisu define lolos iha Konstituisaun RDTL. "Tuir Dekretu lei Nu. 16/2009, lora 18 fulan Marsu, Lei Organika Polisia Nasional Timor- Leste (PNTL), forsa siguransa ida ne'ebé iha misaun atu defende legalidade demokratiku, garante siguransa sidadaun no bens nian no proteze direitu sidadaun nian tuir termu ne'ebé estabese iha konstituisaun no iha lei sira, Tuir estratejia no filozofia polisiamentu nian PNTL iha karakteristikas polisia komunitaria, maske nia organizasaun, disiplina, instrusaun no estatutu pesoal nian sei tuir natureza militar, PNTL sei la konstitui forsa natureza militar ida".<sup>1</sup>

## 2. Saida mak PNTL nia Kompetensia?

Tuir artigu 2, numeru 2) Lei Organika PNTL nian define tuir kuadru ba objetivu permanente sira ne'ebé define iha lei siguransa no tuir ambitu politika Siguransa interna nian objetivu fundamental sira PNTL nian maka promove kondisaun siguransa ne'ebé garante funsionamentu normal institusaun demokratiku nian no ezersisiu direitu, liberdade no garantia sidadaun sira nian; Asegura manutensaun orden, siguransa no tranquilidade públiku; Prevene kriminalidade no hahalok seluk ne'ebé kontra lei no regulamentu sira; Hamutuk ho serbisu siguransa seluk no defeza, liu-liu ho FALINTIL-Forca Defeza de Timor-Leste (F-FDTL) no ho Servisu Nasional Intelijensia (SNI) hodi kombate krime organizadu no terorizmu; hamutuk ho estrutura seluk ne'ebé relevante, liu-liu ho F-FDTL no ho Servisu Migrasaun garante vijilansia no fiskalizaun fronteira terrestre no maritima nian no kontrola movimentu ema no sasan nian; Garante no fiskaliza katak tuir lei no regulamentu iha area maritime ne'ebé iha jurisdisaun nasional nia okos, maske la prejudika kompetensia ne'ebé fo ba entidade seluk ne'ebé tuir ambitu atribuisaun nian iha sistema Autoridade Maritima nian, tuir akordu ho direitu internasional no lejizlasaun seluk ne'ebé iha vigor, liu husi kóperasaun ho SNI no Servisu Informasaun Militar husi F-FDTL, Halibur, prosesa no divulga informasaun ho relasaun ba prevensaun no kontrolu kriminalidade nian. Asegura gabinete nasional INTERPOL nian; Liu husi kórdenasaun no Ministeriu Infraestrutura, asegura siguransa rodoviaria tuir ordenamentu, fiskalizaun no regularizasaun trafiku nian; Garante siguransa iha espetakulu desportu no eventu seluk; inklui kompetensia seluk ne'ebé define iha Dekretu- Lei Nu 16/2009, lora 18 fulan Marsu, Lei Organika PNTL nian Artigu 2.<sup>2</sup>

## **FM nia Gravasaun Kona-bá Konfliktu Sira**

### 1. Konfliktu no Insidenti sira iha 2012

Liu husi sesaun ida ne'e FM sei deskreve no analiza konfliktu sira ne'ebé akontese durante tinan 2012 nia laran. Bazeia bá FM nia monitorizasaun lista katak konfliktu hirak ne'e ninia kauza mai husi aspetu politika, sosial, ekonomia no kultura. Serteja katak insidenti sira ne'e iha implikasaun solidu ba siguransa nasional, tanba asidenti hirak ne'e bele rezulta vitima balun hetan kanek no mate. Faktus hatudu katak insidenti sira ne'e konsidera nu'udar "korente konfliktu" ne'ebé hafutar illas iha liña metamorfosis husi siguransa umana bá siguransa públiku.

<sup>1</sup> Lei Organika PNTL: Nú. 09/2009. Kapitolu I, Artigu 1.

<sup>2</sup> Lei Organiku PNTL: Nú. 09/2009. Kapitolu I, Artigu 2.

Horik-an iha razaun hirak ne'e maka FM rekuñese katak kauza konflitu iha Timor-Leste amostra an ho forma oin-oin ne'ebé mai husi kauza politika, kauza sosial (Disputa Rai), Violensia Domestika, Grupu Arte Marsial-GAM, Dezempregu no kauza husi Tua-Manas (Alcohol), Droga no seluk tan.

Tuir Fundasaun Mahein nia monitorizasaun hatudu katak illas husi konflitu politika ne'ebé durante akontese tanba husi interese politika. Iha Timor-Leste nia kazu, insidente barak maka haksumik an iha forma ne'e no sempre rezulta ema mate no kanek. Jeralmente konflitu sira ne'e akontese husi periodu kampaña no hafoin rezultadu eleisaun parlamentar no prezidensial nian. Hanesan hafoin rezultadu eleisaun parlamentar 2012, liu-liu Kongresu Partidu CNRT<sup>3</sup> atu forma V governu Konstitusional ne'ebé ikus mai hamosu tensaun konflitu iha kapital Dili, akontese atakes balu iha parte Komoro, Becora, Kintal Boot no Santa Cruz hodi rezulta ema balu kanek no mate inklui transporte públiku, privadu, UN no polisia nian hetan estragus.<sup>4</sup> Esperensia ida ne'e, tuir FM nia hare'e katak ameasa tebes bá siguransa rai laran tanba ne'e persiza planu prevensaun konflitu husi instituisaun PNTL iha futuru oin mai, liu-liu iha prosesu festa demokrasia boot rua ne'e.

Problema Disputa rai mós kontribui ba konflitus Timor-Leste. Bazeia bá FM nia observasaun identifika katak konflitu barak maka kauza husi disputa rai ne'ebé rezulta ema kanek no mate. Kazu fresku ne'ebé FM nota hanesan akontesementu hadau malu rai iha Selo Malerek Sub-Distritu Aileu Vila, Distritu Aileu. Haktuir husi Xefi Suku Selo Malerek Sr. Jacinto Ribeiro katak, ninia comunidade ho naran Abilio hetan ta'a husi nia familia rasik iha suku Selo Kraik, tamba deit rai pedasuk ida, rezulta vitima ne'e kanek todan.<sup>5</sup> Nune'e mós akontesementu konflitu iha Samalete iha Distritu Ermera ne'ebé baliza ho Distritu Aileu halo ema nain rua mate fatin no na'in rua seluk kanek todan tanba problema hadau malu rai.<sup>6</sup> Insidenti ne'e tuir FM nia perspetiva hanesan urjensia ida ba governu atu kria Lei rai ne'ebé adekuada hodi trata asuntu na'in ba rai hodi nune'e bele minimiza konflitu kona-bá disputa rai ne'ebé halo comunidade barak sai vitima.

Parte seluk, Violensia domestika nu'udar asaun violensia ne'ebé dala barak akontese iha familia, hanesan baku malu entre fen ho laen, inan no aman ho oan nomós ba membru familia sira seluk. Nune'e mós violensia domestika ne'e mosu ho fatores oin-oin. Mosu tanba kestaun finanseiru, ekonomia, tua-lanu no seluk tan. Ezemplu konkretu ida husi kazu violensia domestika ne'ebé relata iha relatoriu Organizasaun Naun Governmental FOKUPERS<sup>7</sup> tinan 2012, rejista 84 kazu.<sup>8</sup>

Kazu seluk ne'ebé provoka hodi hamosu violensia domestika iha Timor-Leste maka tua-lanu. Iha Sub-Distritu Atauro, Distritu Dili, laron 10 fulan Janeiro 2012, laen hemu tua lanu wainhira fila uma deskute malu ho fen no to'o ikus mai laen baku nia fen to'o mate.<sup>9</sup> Sekretariu Estadu

---

<sup>3</sup> Congresso Nacional Reconstrução de Timor-Leste

<sup>4</sup> <http://www.fundasaunmahein.org/2012/07/16/fundasaun-mahein-fm-nia-observasaun-ba-konferensia-partido-congresso-nacional-reconstrucao-de-timor-leste-cnrt/>

<sup>5</sup> Media Diari Nasiona: Tersa, 18 september 2012.

<sup>6</sup> Media Independente: Segunda, 11 Febreiro 2013: <http://www.timorhauniandoben.com/2013/02/hadau-malu-projeitu-rejulta-ema-nain-3.html>

<sup>7</sup> Forum Komunikasi Perempuan

<sup>8</sup> Media Tempo Semanal: Sabdu, 15 Dezemburu 2012:

<http://temposemanaltimor.blogspot.com/2012/12/numeru-violensia-kontra-feto-sei-makas.html>

<sup>9</sup> Media Independente: Sabdu, 04 Feveireu 2012.

Siguransa – SES ne'ebé durante ne'e sai hanesan responsavel masimu hodi proteze vitima sira husi violensia domestika ne'ebé distina iha instituisaun PNTL, liu-liu seksaun Polisia Unidade Vulneravel (PUV), maibé la bele halo servisu ho diak tanba hetan obstaklu boot iha rekursu umanu no facilidade.<sup>10</sup>

Grupu Arte Marsial mós durante ne'e konsidera hanesan parte ida ne'ebé kontribui barak ba konfliktu sira iha Timor-Leste. Públiku hanoin katak Grupu Arte Marsial hahu ona atu lakon ninia sintidu kona-bá arte. Hanesan ezersisiu fizika ida atu dezenvolve saúde diak no defende an wainhira iha situaun perigu maibé komíku oituan mak iha Timor-Leste ema uza GAM hodi halo konfliktu ne'ebé ikus mai rezulta ema kanek no mate. Kazu konkretu ida ne'ebé kauza husi konfliktu entre Dezembru 2011 nia rohan iha kapital Dili no halo membru GAM balun mate inklui halo comunidade paniku tebes atu hala'o sira nia atividade bain-bain.<sup>11</sup> Husi kazu ne'ebé FM sita iha leten nu'udar refrensia ida ba governu atu uza instituisaun kompetente hodi dezeńia planu prevensaun liu husi fortifika polísiamentu komunitaria. No, presiza kria regulamentu ne'ebé solidu ba atividade Arte Marsial nian.

Tua-manas ka Alkohol hanesan bebidas ida ne'ebé importante tebes iha festa ka soru mutu ida. Jeralmente tua-manas iha Timor-Leste identiku ba mane sira. Tanba ne'e, mosu hanoin balun iha sosiadade nia leet ne'ebé dehan " mane tenke hemu tua". Hare'e bá faktus ne'e hatudu katak la'os buat foun wainhira problema barak mosu tanba kauza husi tua-manas ne'ebé identiku ho mane sira. Tuir FM nia hare'e katak konfliktu ne'ebé kauza husi tua-manas iha Timor-Leste persiza lei hodi regula, legaliza no lokaliza konsumedor sira atu bele prevene diak liu tan iha futuru oin mai.

## **2. Kazu oho malu iha 2013**

Iha biban ne'e FM sei lekar sai kazu oho malu ne'ebé akontese durante 2013. Espesifikamente FM sei mostra kazu oho malu iha Dili no Ermera (Sama Lete) ne'ebé fornese impaktu negativu ba sosiadade iha fatin refere.

### ***a. Kazu oho malu iha Sama-Lete***

Kazu oho malu ne'ebé akontese iha Distritu Ermera, Suku Sama-Lete loke pajina 2013 ho sentimentu triste iha comunidade Sama-Lete, Distritu Ermera. Komunitade sofre sentimentu tauk no lamenta direitu ba siguransa. Tuir mai ne'e FM sei sita kronolojia kazu oho malu Grupu Arte-Marsial halo Asaltu, Ema Na'in 4 Mate.

Grupu husi arte-marsial halo asaltu ba uma kain ida, ne'ebé rezulta ema na'in haat (4) mate. Akontesementu ne'e iha 6 Feveireiru 2013, iha suku Sama Lete, Aldeia 2 Sub-Distritu Railaku, Distritu Ermera. Mate isin na'in haat ne'e identifika, na'in tolu kompostu husi aman Domingos Carvalho de Oliveira ho nia kaben Sara Dau inklui sira nia oan-feto Ilda de Carvalho ho idade (5) mate fatin, no suspeitu na'in ida mate iha ai-laran hafoin konfrontasaun refere.<sup>12</sup> Husi kazu ne'e, Polisia Nasional Timor-Leste konsege identifika suspeitu hamutuk 37 no iha primeiru

<sup>10</sup> Media Tempo Semanal:, Sabdu, 15 Dezembru 2012:

<http://temposemanaltimor.blogspot.com/2012/12/numeru-violensia-kontra-feto-sei-makas.html>

<sup>11</sup> Mahein Nia Lian Nú. 44, 25 Janeiru 2013.p7

<sup>12</sup> Media Timor Roman: Segunda, 11 Feveireiru 2013: <http://timoroman.com/kazu-oho-malu-sama-lete-railaco-pntl-detein-ona-suspeitu-34/>

interogatoriu ba suspeitu hamutuk 19 Tribunal Distrital konsege identifika ema na'in 8 mak sai nu'udar autor prinsipal ba kazu homesidui ne'e, no na'in 4 seluk tama ona prizaun preventiva hodi tuir prosesu investigasaun.<sup>13</sup> Parte ida ne'e, tuir Fundasaun Mahein PNTL hahu ona esforsu tomak atu hala'o lei no orden hodi halo atua ema kriminozu sira. Maibe FM nia peroukupasaun maka tanba sa laiha planu ba asaun prevensaun kona-ba kazu konflitu entre GAM iha Timor-Leste? Fundasaun Mahein sujere prezisa fortifika no implementa polisiamentu komunitaria atu nune'e bele prevene konflitu entre GAM ne'ebé sempre halo comunidade moris la hakmatek no lakon sira nia vida. Kazu Sama-Lete nu'udar ezemplu ida tanba laiha prevensaun husi PNTL maske antes ne'e iha ona konflitus entre GAM.<sup>14</sup>

*b. Kazu oho malu iha Dili*

Povu Timor-Leste liu-liu iha kapital Dili wainhira tama 2013, senti preokupa no lamenta tebes ho situasaun rai laran hanesan ema baku malu no oho malu entre joven sira no Grupu Arte Marsial sira. Hanesan Fundasaun Mahein nia monitorizasaun husi inisiu 2013 (entre fulan Janeiru no fevereiru) akontese kazu oho malu ne'ebé sai debate públiku iha Timor-Leste. Iha sesaun ida ne'e, Fundasaun Mahein koko oferta kazu oho malu ne'ebé akontese iha Kapital Dili maka hanesan tuir mai ne'e:

1. *Kazu Aitarak-Laran-Dili; (Sona mate Jorge Ribeiro)*: Kazu konflitu ne'ebé akontese iha area Aitarak-Laran no iha los Palasiu Prezidensial nia oin hodi sona joven Jorge Ribeiro alias Joe (19) ne'ebé ikus mai hakotu nia pregrinasaun iha lora 25 Feveiru 2013 tanba hetan atake husi grupu joven balun. Tuir kronolojia akontesimentu ne'ebé Jornal Diario Nacional públika katak konflitu ne'e involve husu joven na'in lima husi bairu seluk ne'ebé duni no baku matebian nia primu Caetano. Maibe matebian Jorge Ribeiro sai fali vitima wainhira koko atu salva ninia primu husi grupu juventude ne'ebé ataka lesuk nia primu. Matebian ne'ebé nu'udar eis estudante Escola Tekniku Profesional (ETP) Becora ne'e, hetan sona husi membru grupu joven na'in lima ne'e husi kotuk borus to'o iha nia hirus matan, no Jorge hakotu nia iis iha fatin.<sup>15</sup>
2. *Kazu Kintal Ki'ik-Dili; (Oho Antonio Barreto)*: Kazu ida ne'e mós nu'udar kazu asasinadu ida ne'ebé organizadu husi grupu deskuinesidu hodi oho vitima ne'ebé nu'udar Supervisor Kompañia Security Maubere nian. Diretúr Security Maubere, Marcos Fernandes Fuka katak matebian Antonio Barreto hala'o servisu iha zona Tres, antes hetan oho husi ema deskuinesidu wainhira halo servisu. Matebian nia mate-isin rasik hetan husi membru intelejen ne'ebé halo mós patrollamentu iha area Kintal-Ki'ik no kontaktu ba dirasaun Kompañia Maubere tanba vitima monu (mate) ho hatais farda Security Maubere nian.
3. *Kazu Delta-Dili; (Oho Rita Soares)*: Kazu seluk ne'ebé tuir Fundasaun Mahein nia konsiente katak nu'udar kazu extra-ordinariu no halo públiku preokupa liu-liu feto maluk sira maka kazu laen oho nia fen (Rita Soares) iha parte Comoro nian iha inisiu Janeiru

<sup>13</sup> Media Independente: Segunda, 18 Feveiru 2013.

<sup>14</sup> Media Independente: Tersa, 12 Feveiru 2013.

<sup>15</sup> Jornal Nacional Diario, pagina 1; 26 /02/2013

2013. Kazu refere sai debate públiku husi entidade hotu iha nasaun ida ne'e. Asosiasaun Mane Kontra Violensia – AMKV kondena maka'as hahalok krimi ne'e.<sup>16</sup> Nune'e mós Primeira Dama Isabel Ferreira senti triste no husu ba ministeriu kompetente atu sansaun ne'ebé todan atu nune'e suspeitu labele halo komete tan erru hanesan iha futuru.<sup>17</sup>

Husi korente kazu krime no insidenti sira ne'ebé Fundasaun Mahein sita iha leten sai mós preokupasaun ba comunidade bai-bain tanba senti trauma no in-siguransa ba sira nia moris. Sentimentu trauma no lamentasaun ne'e mai husi feto maluk Juliana Marques ho situasaun atual rai laran nian ne'ebé joven sira oho malu arbiru hodi hatauk ema barak. No, senti tauk tanba joven sira ne'ebé gosta hemu tua-manas no lanu dala barak kria konflitu ne'ebé implika ema seluk nia siguransa umanu.<sup>18</sup>

Bazeia ba kazu krime hirak ne'ebé Fundasaun Mahein mensiona iha leten nu'udar teste ida bá instituisaun PNTL atu dezeńu lolos estratejia no planeamentu profundu ida hodi bele evita ka prevene aktu kirimi hirak ne'e iha futuru oin mai. Fundasaun Mahein senti apresia no boavontade servisu atu bele garantia siguransa rai laran. Maibe hare'e husi volume kazu oho malu ne'ebé akontese entre fulan Janeiro no Fevereiro, tuir FM nia analiza no observasaun identifika katak servisu PNTL ladun efetivu, intermus iha operasaun ka patrollamentu. Realidade kazu atuasaun PNTL sempre tarde hasoru konflitu entre gurpu juventude sira no susar kaer aktu kriminozu sira. Ida ne'e hatudu katak PNTL seidak iha planu prevensaun ne'ebé bele aprosima ho tipu konflitu no krime sira iha Timor-Leste. FM nia hare'e katak prevensaun konflitu sei menus tebes iha servisu PNTL. No, oinsa bele transforma servisu PNTL ne'e sai efetivu iha asaun prevensaun? Resposta husi pergutans ne'e FM koko esplika detallu iha sub-tema tuir mai ne'e;

## **Solusaun**

*“La Rezolve maibé bele Reduz”*

### **1. PNTL Servisu Masimu no Familia Kontribui Paz**

Konflitu no insidenti sira nu'udar sasukat ida hodi sukat efektividade no profesionalizmu servisu PNTL nian. Signifika katak PNTL persiza servisu diak liu tan. Nu'udar nasaun independente ne'ebé mai ho pluralizmu rasa, etniku, grupu no kultura dala-barak buras ho konflitu. Maibe Konflitu ne'e normal no mosu iha nasaun ne'ebé deit. Problema ne'ebé mosu hanesan xamada ida ba PNTL atu servisu maka'as liu tan.

Iha sorin seluk, familia maka hun no abut ba paz nian. Familia diak no paz sei refléta ba oan no joven diak no paz. “Dezenvolve koperativa entre familia no PNTL bele sai solusaun ida atu kombate krime no oho malu, Haktuir Komandante Operasaun PNTL Armando Monteiro iha nia

---

<sup>16</sup> Media Independente, Kinta, 16 Fevereiro 2013.

<sup>17</sup> *Ibid*

<sup>18</sup> Media STL: Kinta, 14 Marsu 2013.

servisu fatin, Kaikoli-Dili".<sup>19</sup> Wainhira ambiente estabilidade mosu iha rai laran la'os deit responsabilidade PNTL maibe responsabilidade sidadaun tomak. Tanba familia no PNTL maka ajente paz no hakmatek iha nasaun Timor-Leste.

## 2. Operasaun Preventiva (Patrullmentu)

Asaun preventiva ba konfliktus no krime sira ne'ebé afeita ba siguransa ema barak nian maka PNTL presiza halo operasaun ka patrolla durante oras 24 iha kapital Dili. Representante povu iha uma fukun parlamentu Nasional ejizi PNTL aplika operasaun ida ne'e. Razaun mak sempre mosu konflitu iha bairo-bairo ne'ebé volume sempre kontinua aumenta husi tinan bá tinan no povu moris iha situasaun in-siguransa.<sup>20</sup> Ejizensia seluk mós mai husi Deputadu Bankada FRETRELIN, Elidio Antonio Faculto sujere PNTL sira tenki halo patrullamentu iha sidade Dili wainhira tempu kalan atu nune'e bele asegura siguransa bá comunidade sira la'o kalan.<sup>21</sup>

Husi esteimentu ne'ebé FM lista iha leten, tuir prespetiva FM katak patrullhomentu nu'udar dalan ida atu reduz krime no kombat konflitu ne'ebé sai ameasa ba siguransa umanu nian. Tanba, realidade joven barak tu'ur iha luron tempu kalan no bele fo ameasa siguransa wainhira sadik malu no baku malu otomatikamente bele fo impaktu bá imajen siguransa rai laran nian. Aleinde ne'e, FM mós sujere katak efetividade ba prevensaun konflitu no aktu krime sira maka presiza monta postu iha bairo-bairo no kontinua fortifika polísiamentu komunitaria atu nune'e bele minimiza aktu sira ne'ebé bele estraga estabilidade nasional.

## 3. Presiza Eletrisidade Lakan 24 Oras Iha Sidade (Sistema Preventiva)

Eletrisidade parte ida ne'ebé importante hodi kontribui ba estabilidade nasional. Signifika katak ho eletrisidade ne'ebé lakan durante tempu kalan (oras 24) sei halo naroman sidade Dili hodi bele fasilita servisu PNTL iha tempu patrullamentu. Durante ne'e, preokupasaun barak mai husi povu kona-bá eletrisidade ne'ebé sempre mate lakan iha kapital Dili, liu-liu iha tempu kalan.<sup>22</sup> Membreu Parlamentu Nasional (PN) husi Bankada FRETRELIN, Deputada Maria Angelica mós kestiaona situasaun ikus-ikus ne'ebé ema oho malu iha tempu kalan tanba nakukun, nomós siguransa ladun forte.<sup>23</sup>

Tuir Fundasaun Mahein nia prespetiva rasik katak estrada ne'ebé nakukun bele sai ameasa ida mós ba siguransa. Akontesementu oho malu no aktu krime wain maka akontese iha situasaun nakukun nia laran. Estrada ne'ebé nakukun hanesan iha Dili laran perigu tebes ba ema ne'ebé la'o kalan no facil tebes ba ema ne'ebé hakarak atu halo krime.

Ho ida ne'e, tuir Fundasaun Mahein katak presiza apoiu mós eletrisidade (naroman) ne'ebé bele sai alternativu ida bá prevensaun aktu krime no fasilita servisu PNTL wainhira halo atusaun ruma iha tempu kalan.

<sup>19</sup> Entrevista Komandante Operasaun PNTL, 15 Maret 2013.

<sup>20</sup> Media STL: Sexta, 1 Marsu 2013.p3

<sup>21</sup> *Ibid.*

<sup>22</sup> <http://timorlorosaenacaodiario.blogspot.com/2010/09/komunidade-ejiji-januario-pereira.html>

<sup>23</sup> Media STL: Sabdu, 9 Marsu 2013, p1 no 11.

#### 4. Loke Kampu de Servisu

Loke kampu de servisu hanesan parte ida hodi prevene ba aktu krime sira ne'ebé bele implika bá siguransa nasional. Maibé realidade joven barak iha kapital Dili la hetan servisu ne'ebé bele kontribui mós ba aumenta volume konfliktus no krime wainhira sira laiha atividade loro-loron hodi bele sustenta sira nia moris.<sup>24</sup>

Nune'e mós faktus balun ne'ebé Fundasaun Mahein identifika liu husi peskiza hatudu katak joven barak ne'ebé kompañia hasai (pecat) husi servisu tanba dukur no la disiplina iha servisu fatin. Aktu ne'e mós bele aumenta volume in-sasistifasaun husi empregu ne'e rasik hodi involve an iha grupu no hemu tua-lanu hodi halo aktu krime. Tanba ne'e, FM sujere ba governu atu hanoin loke kampu de servisu nu'udar meus prevensaun ida ba aktu krime no konfliktus iha Timor-Leste.

#### 5. Rekursu Humanu

Asuntu rekursu umanu instituisaun PNTL mós nu'udar parte importante ida atu bele halo servisu ho eficiente no efikasia. Tanba numeru polisia ne'ebé la suficiente no ladun balansu ho numeru populasau Timor-Leste bele implika ba servisu PNTL iha implementasaun servisu prevensaun konfliktu nian. Ho ida ne'e, Fundasaun Mahein hanoin katak presiza governu tau konsiderasaun ba kuantidade no kualidade PNTL hodi bele hafasil servisu PNTL iha servisu prevensaun konfliktu nian.

#### **Rekomendasaun**

Parte ikus husi relatoriu ne'e Fundasaun mahein sei oferese rekomendasaun balun sobre servisu prevensaun konfliktu hanesan dalan atu diminui no kombate aktu krime no homesidu ba institusaun relevante sira.

##### 1. Patrolla 24 Oras

Fundasaun Mahein rekomenda ba institusaun PNTL atu halo patrolimentu 24 oras iha comunidade. Ho kondisaun mós katak Governu liu husi Sekretariu Estadu Siguransa persiza hare mós rendimentu no fasilidade ne'ebé diak ba institusaun refere.

##### 2. Persiza Monta Eletrisidade iha Estrada

Fundasaun Mahein rekomenda atu governu liu husi Sekretariu Estadu Eletrisidade atu bele monta Lampu (Eletrisidade) iha dalan boot. Naroman no eletrisidade bele sai momentu preventive ida.

##### 3. Postu Polisia Komunitaria

Ho hanoin atu mantein ino fo prevensaun ba konflito tan ne'e diak tebes atu hari postu polisia komunitaria iha comunidade hodi bele prevene no asegura siguransa iha comunidade. Fundasaun Mahein rekomenda ba Sekretariu Estadu Siguransa atu estabelese postu polisia

---

<sup>24</sup> <http://cjitl.org/cjittimor-today/cjittl-opinion/297-dezempregu-biban-ida-kria-instabilidade-iha-tl>



Komunitaria ho kualidade ne'ebé diak iha bairo hotu, nune'e mós aumenta facilidade kamunikasaun hanesan Radio ba membru PNTL sira. Aleinde ne'e FM mos rekomenda governu presiza instituisionaliza polisia komunitaria hodi hala'o nia misaun prevensaun konflitu ho mantein lei no orden iha sosiedade nia le'et.

#### 4. Loke Kampu Traballu

Fundasaun Mahein rekomenda ba SEFOPE atu bele loke kampu trabalhu no halo kapasitasaun ba empregu sira iha seitor skill no umana. Mentaliza empregu sira atu servisu tuir regras, disiplina no profesional.

#### 5. Rekursu humanu

Fundasaun Mahein rekomenda ba Sekretariu Estadu Seguransa atu aumenta kuantidade no hadia kualidade rekursu umanu, kualidade serbisu, tanba atu fornese siguransa no prevensaun ne'ebé efetivu presiza edukasaun no formasaun ne'ebé adekuaudu no facilidade ne'ebe naton atu fasilita serbisu polisiamentu.

#### 6. Kontrola Importasaun no Estabelese Lei Konsumu Tua-Manas.

Bazeia ba isidente sira ne'ebé akontese nu'udar kauza husi tua-manas, FM rekomenda ba governu persiza kontrola importasaun tua-manas no lala'ok konsumu tua-manas, tanba impaktu husi tua manas ne'e afeita boot ba siguransa umanu ne'ebé ikus mai bele afeita ba siguransa publiku. FM mos rekomenda ba governu atu regula, lokaliza no legaliza maneira hemu tua atu nune'e bele ajuda servisu polisia iha sistema kontrola konflitu ne'ebé kauza husi tua-manas ka alkohol.

## **Bibliografi**

### **Dokumentu:**

Lei Nu 16/2009, Ioron 18 fulan Marsu, Lei Organika PNTL nian Artigu 2.

Brosura Fundasaun Mahein (FM): Mai Ita ba Kuinese Ita nia Polisia

Fundasaun Mahein nia Monitorizasaun, 15 jullu 2012

Relatoriu ONG Belun, AtRes Revista Situasaun iha Fulan Janeiru 2012

Relatoriu Belun Programa AtRes REVISTA SITUASAUN: Abril 2012

Relatoriu Fundasaun Mahein

### **Intervista:**

Intervista Komandante Operasaun PNTL: Sexta, 15 Marsu 2013.

### **Media :**

Media Tempo Semanal: Sabdu, 15 Dezembru 2012

Media Independente: Kinta, 12 Abril 2012

Media Independente: Tersa, 12 Feveireiru 2013

Media Diariu Nasional: Tersa, 18 Setembru 2012

Media Independente: Sabdu, 04 Feveireiru 2012

Media Diariu Nasional: Tersa, 26 Feveireiru 2013

Media STL: Kinta, 14 Marsu 2013

Media STL: Sexta, 01 Marsu 2013

Media STL: Sabdu, 9 Marsu 2013

### **Links/Internet:**

<http://temposemanaltimor.blogspot.com/2012/12/numeru-violensia-kontra-feto-sei-makas.html>

<http://timorlorosaenacaodiario.blogspot.com/2010/09/komunidade-ejiji-januario-pereira.html>

<http://timoroman.com/kazu-oho-malu-sama-lete-railaco-pntl-detein-ona-suspeitu-34/>

<http://cjitl.org/cjitltimor-today/cjitl-opinion/297-dezempregu-biban-ida-kria-instabilidade-ih-tl>

<http://www.fundasaunmahein.org/2012/07/16/fundasaun-mahein-fm-nia-observasaun-ba-konferensia-partido-congresso-nacional-reconstrucao-de-timor-leste-cnrt/>